



Rabu, 18 September 2024
Ogen: Sakaria 9:1-8



Kukawali NegriKu



Lit ketenengen, ketetapan ukur dingén *percaya diri* kune lit si engkawali kita. Si perdiatèken kalak si lit pengawalna ku ja pe ia lawes, umpamana pejabat negara, teridah arah ayona pe meriah ukur, teneng dingén la lit kebiaren. Pengawal e me si ertanggung jabap njaga keamanen, kenyamanan, ketenengen si man kawalenna. Biasana sibuken ia asangken si man kawalen. Kune lit ingan man tujun, leben nge ia ndarami situasi ingan e dingén erusaha lalap gelah ingan e mehuli. I bas perukureнна lalap terjeng kiniulin si man kawalenna.

Wari enda si oge ncidahken Dibata engkawali bangsaNa. Lit pigapiga bangsa si nerang bangsa Dibata, sierbahanca erta-ertana i rampas, ilawan Dibata musuh bangsaNa, iukumna bangsa-bangsa sekelewet Israel si sedekah enda neggo nerang bangsa Israel. E maka mbiar me musuh-musuh e sabap ibenterkenNa me kebayakenna ku lawit janah kuta e icilukna seh radas kerina.

Bage me pengkawali Dibata man bangsa kekelengenNa. Padan Dibata, "Kukawali me negriKu, janah la ku pelepas tentara kalak mentas arah e. Lanai Ku bere raja penindas nindih bangsaKu. Sabap enggo Kuidah uga kiniseran bangsaKu." Seh malamna ate bas kai siipadanken Dibata man bangsaNa.

Kita kap bangsa Dibata e, keleng ateNa e tergejap arah pengkawaliNa bas kegeluhenta. Bas perdalanan geluhta, kai dage arusna si lakoken selaku bangsa Dibata. Lalit si deban selain ngatakan bujur i bas kerina pengkawali sienggo i bahanNa i bas geluhta. Pengatakan bujur e teridah min arah mereken diri, megiken kata ajar/kata pedahNa. ItuduhiNa me dalan si man bentasen, dingén tek kel kita bekas penuduhiNa e seh me kita ku ingan si dem i bas kedamen, ketenangen si sampur ras kemalèmen ate.